



La regenza grischuna en sia nova cumposiziun: Barbara Janom Steiner, Christian Rathgeb, Martin Jäger (president), Jon Domenic Parolini e Mario Cavigelli. FOTO G. CAPAUL

Regenza en nova cumposiziun

■ (anr/gc) L'emprim inscunter da la regenza da quest onn cun ils represchentants dals meds da massa dal Grischun ha gi lieu ier en Chasa grischa a Cuira. Il president, cuss. gov. Martin Jäger, ha fatg in cordial bainvegni era cun buns auguris per l'entschatta da l'onn. Per l'emprima giada è la regenza sa preschentada en sia nova cumposiziun cun cuss. gov. Jon Domenic Parolini. Ils regents eran gist vegnids nà da lur emprima sesida da quest onn. Sin dumonda ha il nov cusseglier guvernativ Parolini palesà ch'el saja vegnì retschavì fitg cordialmain dal gremi guvernamental. El saja il sulet regent ch'haja ses departament en Chasa grischa. L'emprima visita haja el fatg als uffizis e collavuratur da ses departament

ed alur prendì part da l'inscunter da Bumaun da Grischun Vacanzas. Ins ha gi l'impressiun ch'il nov magistrat sa sentia detg bain e d'esser intgantà da sia nova incarica.

Bunas novas per e da la ministra da finanzas

Cun grond e vesaiel plaschair ha cuss. gov. Barbara Janom Steiner commentà la buna nova che la Banca Naziunala Svizra (BNS) haja fatg per 2014 in gudogn recordial da 38 milliardas 2014. I dettia segir ina milliarda per confederaziun (ina terza) ed als chantuns (duas terzas). Per il Grischun sajan quai 16,3 milliuns. Cunquai ch'il gudogn da la BNS surpasia 10 milliardas quintian ils schefs da fi-

nanzas chantunals fermamain cun anc dapli – era pervi ch'els n'hajan survegnì l'onn passà nagut. Quels daners gajan en ils meds dal chantun, uschia ch'il deficit previs sa reduceschia per quel import.

La regenza al WEF/FEM a Tavau

Per l'avertura dal FEM, che ha lieu dals 21 fin ils 24 da schaner da quest onn a Tavau, saja la regenza preschenta in corpore. Adina puspè là è cuss. gov. Christian Rathgeb sco schef dal departament da giustia, segirezza e sanadad. Era per il responsabel dal departament d'economia d'economia e socialesser, Jon Domenic Parolini, datti divers inscunters en il lieu dal FEM.